

書名 藝文類聚一百卷 嘉靖中天水胡纘宗刊本
撰者 唐 歐陽詢 撰
卷 卷四
內容分類 子-類書 彙考 唐五代
索書號 子部-類書-2
編號 C5912500

彩色首頁1

東洋文化研究所漢籍目錄 編號: C5912500
東洋文化研究所漢籍目錄所藏漢籍善本文影像資料庫 索書號: 子部-類書-2
漢籍善本文影像資料庫文本 藝文類聚一百卷 嘉靖中天水胡纘宗刊本
版權所有: 東京大學 東洋文化研究所
使用上的注意事項

卷四

藝文類聚卷第一

唐太子率更令弘文館學士歐陽詢撰

天部上天日月星雲風

天

曰大哉乾元萬物資始乃統天雲行雨施品物流形大明終始六位
時乘六龍以御天乾道變化各正性命 又曰立天之道曰陰與陽
又曰皇天震怒命我文考
大行健 尚書曰乃命羲和欽若昊天 又曰皇天震怒命我文考
大威 禮記曰天地之道博也厚也高也明也悠也久也日月星辰
敷於大威 論語曰天何言哉四時行焉百物生焉 老子曰天得
以清 物覆焉 春秋繁露曰天有十端天地陰陽水土金木火人凡十端天亦
有十端 氣哀樂之心與人相副以類合之天人一也 爾雅曰穹蒼蒼天
蒼蒼天夏爲昊天秋爲旻天冬爲上天 春秋元命苞曰天不足西
於九故天周九八十一萬里 渾天儀曰天如雞子天大地小
有水地各乘氣而立載水而浮天轉如車轂之運 黃帝素問曰



恒觀物而增酸歷四時以迭感悲此歲之已寒撫傷懷以嗚咽望永路而
汎瀾 梁江淹四時賦曰至於冬陰北邊永夜不曉平蕪際海千里飛鳥
何嘗不夢帝城之阡陌故鄉之臺沼 晉陸雲歲暮賦曰顓頊御時玄冥
統官淪重陽於潛戶兮嚴積陰於司寒堅冰涸於川底兮白雪墮於雲端
時凜戾其可悲兮氣蕭索以傷心悽風愴其鳴條落葉翻而灑林獸藏丘
而絕迹兮鳥攀木而棲音山振枯於層嶺兮人懷慘於重襟 梁蕭子雲
歲暮直廬賦曰日躔女度歲華云暮衡輕炭燥權重泉涸藏玄武於大陰
蟄騰虺於高霧日臨圭而易落 啓中杙而南徠凝寒氣於廣庭洞層陰於
端庫風殄切而晚作雲滄浪而晦景霰的皪於彤庭霰歲蕤於丹屏韜罽
罽之飛棟沒屠蘇之高影始飄舞於圓池終停華於方井 晉傅玄大寒
賦曰五行修而竟驚兮四節紛而電逝諒暑往寒來十二月而成歲日月
會於折木兮重陰淒而增肅彩虹藏於虛廓兮鱗介潛而長伏若乃天地
凜冽廢極氣不嚴霜夜結悲風 晝起飛雪山積蕭條萬里百川明而不流
兮冰凍合於四海扶木憔悴於 湯谷若華零落於濛汜 藝文類聚卷三

藝文類聚卷第四

歲時中 元正 人日

正月十五日 月晦 寒食 三月

五月五 七月七 七月十五 九月九

元正

尚書曰月正元日舜格于文祖

列子曰邯鄲之民以正月之旦獻鴈於

簡子簡子大悅厚賞之客問其

故簡子曰正旦放生示有恩也 孔叢子

曰邯鄲民以正月旦獻鴈於趙

王而綴以五采王大悅 東觀漢記曰戴

憑爲侍中正旦朝賀帝令群臣

說經義不通者奪其席憑遂重五十餘席

事具講 漢書曰鮑宣字子都哀

帝時正旦日蝕宣上書諫曰陛下父事天

母事地子養黎民父虧明母震

動子訛言今日蝕三陽始小民正月朔旦

尚惡敗器物况日虧缺乎 漢

雜事曰正月朝賀三公奉璧上殿嚮御坐

北面太常使贊曰皇帝爲君興

三公伏皇帝坐乃前進璧 典略曰明帝

使博士馬均作司南車水轉百

戲正月朝造巨獸魚龍曼延弄馬倒騎備

如漢西京故事 魏略曰正始

元年商風大起數十日發屋折樹動太極

殿東閣正旦大會又甚傾床案曹休將誅之徵也王渾集曰詔問明正旦會四方計吏入見臨朝當何所宜渾奏舊正會計吏軒下中書令宣詔問方土所宜士人賢才隱伏未逐風俗好尚禮教之宜勤農務本以盡墾殖之利刑獄清理無枉濫之失郡守長吏勤心治政爲民興利除害訓化之績授以紙筆意陳聞見以明聖旨垂心四遠晉咸康起居注曰十二月庚子詔曰正會日百寮增祿賜醪酒人二升世說曰元帝正會引丞相王導登御牀王公固辭中宗引之彌苦文獻曰使太陽與萬物同暉臣下何以仰瞻帝乃止鄧德明南康記曰昔有盧耽仕州爲治中少學仙術善解飛騰每夕輒凌虛歸家曉則還州嘗元會至晚不及朝列化爲白鵠至閣前徊翔欲下威儀以第擲之得一隻履耽驚還就列内外左右莫不駭異時步騭爲廣州刺史意甚惡之便以狀列聞遂至誅滅裴玄新語曰正朝縣官殺羊懸其頭於門又磔雞以副之俗說以厭穢氣玄以問河南伏君伏君曰是土氣上升草木萌動羊齧百草雞啄五穀故殺之以助生氣詩魏陳思王曹植元會詩曰初歲元祚吉日惟良乃爲嘉會宴

此高堂衣裳鮮潔黼黻玄黃珍膳雜選充溢圓方俯視文軒仰瞻華梁保茲善千載爲常歡笑盡娛樂哉未央皇室榮貴壽考無疆晉荀勗正大會行禮歌詩曰於皇元首群生資始履端大享敬御福祉肆覲群后爰及卿士欽順時財允也天子又曰明明天子臨下有赫四表宅心惠浹荒貊柔遠能邇孔淑不逆來格祁祁邦家是若又曰光光邦家天篤其祐丕顯詰命顧予三祖世德作求奄有九土思我皇度彝倫攸序晉曹毗正朝詩曰靈春散初澤焚燭青陽舒佳袍忽已故今載奄復初軟節暢宇宙和風被八區晉劉和妻王氏正朝詩曰稔丹冥機運迅矣四節經太簇應玄律青陽兆初正晉傅克妻辛氏元正詩曰元正啓令節嘉慶肇自茲咸奏萬年觴小大同悅熙晉荀勗正會公王上壽酒歌曰踐元辰延顯融獻羽觴祈令終我皇壽而隆我皇茂而嵩本枝奮百世休祚鍾聖躬賦晉傅玄朝會賦曰考夏后之遺訓綜殷周之典制採秦漢之舊儀肇元正之嘉會於是先期戒事衆發允勅萬國咸享各以其職翼翼京邑巍巍紫極前三朝之夜中庭燎是以舒光華燈若乎火樹熾百枝之煌

煌俯而察之如亢燭龍而炤玄方仰而觀焉若披丹霞而鑒九陽晉劉臻妻正旦獻椒花頌曰遊穹周廻三朝肇建青陽散暉澄景載煥美哉靈葩爰采爰獻聖容映之永壽於萬

人日

荆楚歲時記曰正月七日爲人日以七種菜爲羹翦綵爲人或鏤金薄帖屏風上忽戴之像人入新年形容改新董勛問禮俗曰一日爲雞二日爲狗三日爲猪四日爲羊五日爲牛六日爲馬七日爲人賈充典戒曰人日造華勝相遺像瑞圖金勝之形又像西王母戴勝也劉臻妻陳氏進見儀曰正月七日上人勝於人隋陽休之人日登高侍宴詩曰廣殿麗年輝上林起春色風生拂雕輦雲廻浮綺翼薛道衡人日思歸詩曰入春纔七日離家已二年人歸落鴈後思發在花前李克登安仁峯銘曰正月七日厥日惟人策我良駒陟彼安仁

正月十五日

玉燭寶典曰正月十五日作膏以祠門戶

荆楚歲時記曰風俗望日以

楊枝插門隨楊枝所指而祭其夕迎紫姑神以卜史記曰漢家以望日祀太一從昏時到明今夜遊觀燈是其遺迹西域記曰摩竭陀國正月十五日僧俗雲集觀佛舍利放光雨花涅槃經曰如來闍維訖收舍利罌置金床上天人散花奏樂繞城步步燃燈十二里唐蘇味道望日夜遊詩曰火樹銀花合星橋鐵鎖開暗塵隨馬去明月逐人來遊騎皆穠李行歌盡落梅金吾不惜夜玉漏莫相催崔液夜遊詩曰玉漏銅壺且莫催鐵關金鎖徹明開誰家見月能閑坐何處聞燈不看來又曰神燈佛火百輪張刻像圖形七寶裝影裏如聞金口說空中似散玉毫光又曰金勒銀鞍控紫騮玉輪朱幘駕青牛驂驪始散東城曲倏忽還逢南陌頭

月晦

荆楚歲時記曰元日至月晦並爲酺聚飲食每月皆有晦朔正月初年時俗重以爲節玉燭寶典曰元日至月晦人並爲酺食士女悉湔裳斟酒於水湄以爲度厄帝王世紀曰堯有草夾階而生每月朔生一莢月半則生十五莢自十六日一莢落至月晦而盡月小則餘一莢厭而不落以

為瑞草名為蓂莢一名曆英詩太宗皇帝月晦詩曰晦魄移中律凝暄起麗城罩雲朝蓋上穿露曉珠呈笑樹花分色啼枝鳥合聲披襟歡眺望極目暢春晴北齊魏收晦日汎舟應詔詩曰裊裊春枝弱關關新鳥呼棹唱忽逶迤菱歌時顧慕睿賞芳日色宴言忘日暮游豫慰人心照臨康國步後魏盧元明晦日汎舟應詔詩曰輕灰吹上管落蓂飄下蒂遲遲春色華晚晚年光麗

寒食

周禮曰司烜氏仲春以木鐸脩火禁于國中為季春將出火也荆楚歲時記曰去冬至一百五日即有疾風甚雨謂之寒食周斐先賢傳曰太原舊俗云介子推焚骸一月寒食莫敢煙爨陸翽鄴中記曰并州俗冬至後百五日為介子推斷火冷食三日作乾粥今之糗是也又曰寒食三日作醴酪煮粳米及麥為酪擣杏仁煮作粥范曄後漢書曰周舉遷并州刺史太原一郡舊俗以介子推焚骸有龍忌之禁至其月咸言神靈不樂舉火舉移書於子推廟云春中寒食一月老小不堪今則三日而已

古今藝術圖曰北方山貳寒食日用鞦韆為戲以習輕趨者李崇嗣寒食詩曰普天皆滅燭匝地盡藏煙不知何處火來就客心燃宋之問途中寒食詩曰馬上逢寒食途中屬暮春可憐江浦望不見洛橋人沈佺期嶺表寒食詩曰嶺外逢寒食春來不見錫洛中新甲子明日是清明李魏武帝明罰令曰聞太原上黨西河鴈門冬至後百五日皆絕火寒食云為介子推且北方冱寒之地老少羸弱將有不堪之患令到人不得寒食若犯者家長半歲刑主吏百日刑令長奪一月俸

三月三日

應劭風俗通曰按周禮女巫掌歲時以祓除疾病禳者潔也故於水上盟潔之也已者祉也邪疾已去祈介祉也韓詩曰三月桃花水之時鄭國之俗三月上巳於溱洧雨水之上執蘭招魂續魄拂除不祥漢書曰太后春幸蠶館率皇后列侯夫人桑遵灞水而祓除續漢書禮儀志曰三月上巳官民皆潔於東流水上自洗濯祓除宿垢為太潔魏志曰袁紹三月三日大會賓徒於薄落津聞魏郡兵及黑山賊于毒等數萬人共覆

鄴城殺守坐中客家在鄴者皆憂怖失色或起而立紹容貌自若不改常度竹林七賢論曰王濟嘗解襖洛水明日或問王曰昨遊有何語議濟曰張華善說史漢裴逸民叙前言往行袞袞可聽事具談論部夏仲御別傳曰仲御詣洛到三月三日洛中公王以下莫不方軌連軫並至南浮橋邊梁男則朱服耀路女則錦綺粲爛仲御時在船中曝所市藥雖見此輩穩坐不搖賈公望見之深奇其節願相與語此人有小膽有似冀缺走問船中安坐者爲誰仲御不應重問徐乃荅曰會稽北海間民夏仲御晉中興書曰王導謂從兄敦曰王仁德未著而名位猶輕兄威名日已振宜有以共相匡舉會三月三日中宗出襖乘肩輦敦導並騎從紀瞻使人覘之既聞敦導騎從乃大驚自出拜於道左中宗從容謂導曰卿吾之蕭何也續搜神記曰盧克獵見麀便射中之隨逐不覺遽忽見一里門如府舍問鈴下鈴下對曰崔少府也進見少府少府語克曰尊府君爲索小女婚故相迎耳三日畢車送克至家母問具狀以對與崔別後四年克三月三日臨水戲遙見水傍有犢車充往開車戶見崔女與三歲男共載情意如初

抱男兒還克又與金銳別 雜五行書曰欲知蠶善惡常以三月三日天陰而無日不見雨蠶大善 續齊諧記曰晉武帝問尚書郎摯虞曰三曲水其義何指荅曰漢章帝時平原徐肇以三月初生三女至三日俱亡一村以爲怪乃相攜之水濱盟沈遂因水以汎觴曲水之義起於此帝曰若如所談便非好事尚書郎束皙曰仲治小生不足以知此臣請說其始昔周公城洛邑因流水以汎酒故逸詩云羽觴隨波又秦昭王三日置酒河曲見有金人出奉水心劍曰令君制有西夏及秦霸諸侯乃因此處立爲曲水祠二漢相緣皆爲盛集帝曰善賜金五十斤左遷仲治爲陽城令

晉張華三月三日後園會詩曰暮春元日陽氣清明祁祁甘雨膏澤流盈習習祥風啓滯導生禽鳥逸豫桑麻滋榮纖條被綠翠華含英於皇我后欽若昊乾順時省物言觀中園讌及群辟乃命乃延合樂華池夜濯清川汎彼龍舟沂遊渚源 又上巳篇曰仁風導和氣勾芒御昊春姑洗應時月元巳啓良辰密雲蔭朝日零雨灑微塵飛軒遊九野置酒會衆賓晉潘尼三日洛水作詩曰晷運無窮已時逝焉可追斗酒足爲歡臨川胡

獨悲暮春春服成百草敷英莢聊爲三日遊方駕結龍旂廊廟多豪俊都
邑有艷姿朱軒蔭蘭皋翠幕映洛湄臨岸濯素手涉水褰輕衣沉鈎出比
目舉弋落雙飛羽觴乘波進素卵隨流歸 晉王濟平吳後三月三日華
林園詩曰蠢爾長蛇荐食江汜我皇神武汎舟萬里迅雷電邁弗及掩耳
思樂華林薄采其蘭皇居偉則芳園巨觀仁以山悅水爲智歡清池流爵
祕樂通玄物以時序情以化宣 晉閻丘冲三月三日應詔詩曰暮春之
月春服旣成升陽土潤水渙川盈餘萌達壤嘉木敷榮后皇宣遊旣宴且
寧光光華輦詵詵從臣微風扇穢朝露翳塵上蔭丹幄下藉文茵臨川滛
盟濯故潔新俯鏡清流仰睇天津藹藹華林巖巖景陽業業峻宇奕奕飛
梁垂蔭倒景若沉若翔浩浩白水汎汎龍舟皇在靈沼百辟同遊擊權清
歌鼓柅行酬聞樂咸和具醉斯柔在昔帝虞德被遐荒干戚在庭苗民來
王今我哲后古聖齊芳惠此中國以綏四方元首旣明股肱惟良樂酒令
日君子惟康 晉王讚三月二日詩曰招搖啓運寒暑代新豐豐不舍如
彼行雲猗猗季月穆穆和春皇儲降止宴及嘉賓嘉賓伊何具惟姻族如

彼葛藟衍于樛木郁郁近侍巖巖台嶽庶寮鱗次以崇天祿如彼崑山
此琚玉巍巍天階亦降列宿右載元首左光儲副大祚無窮天地爲壽
晉陸機詩曰遲遲暮春日天氣柔且嘉元吉隆初已濯穢遊黃河 晉阮
脩上巳會詩曰三春之季歲惟嘉時靈雨旣零風以散之英華扇耀翔鳥
羣嬉澄澄綠水澹澹其波脩岸逶迤長川相過聊且逍遙其樂如何坐此
脩筵臨彼素流嘉肴旣設舉爵獻酬彈箏弄琴新聲上浮水有七德智者
所娛清瀨瀟瀟菱葭芬敷沉此芳鈎引彼潛魚委餌芳美君子戒諸 晉
孫綽三月三日詩曰姑洗幹運首陽穆闡嘉卉萋萋溫風煖煖言滌長瀨
聊以遊眼縹緲蒹葭流綠柳蔭坂羽從風飄鱗隨浪轉 晉庾闡三月三日
詩曰心結湘川渚目散冲霄外清泉吐翠流綠醺漂素瀨悠想眄長川輕
瀾眇如帶 又三月三日臨曲水詩曰暮春濯清已遊鱗泳一壑高泉吐
東岑洄瀾自淨樂臨川疊曲流豐林映綠薄輕舟沉飛觴鼓柅觀魚躍
宋顏延之三日侍遊曲阿後湖詩曰虞風載帝狩夏諺頌王遊春方動宸
駕望幸傾五州山祗蹕嶠路水若驚滄流神御出瑤軫天儀降藻舟萬軸

御行衛千翼泛飛浮雕雲麗璇蓋祥飈被采旂江南進荆艷河徽獻趙謳
又詔宴曲水詩曰道隱未形治彰既亂帝跡懸衡皇流共貫惟王創物永
錫洪筭仁固開周義高登漢祚融世哲葉光列聖太上正位天臨海鏡帝
體麗明儀辰作貳居彼東朝金昭玉粹德有潤身禮不僭器開榮灑澤舒
虹燦電伊思鑄飲每懷洛宴郊餞有疆君舉有禮慕懷蘭甸畫流高陞分
庭薦樂析波浮醴豫同夏諺事兼出濟 又三月三日詔宴西池詩曰河
岳曜圖聖時利見於赫有皇升中納禪載貞其恒載通其變大哉人文至
矣天睠昭哉儲德靈慶攸繁明兩紫宸景物乾元帝宗菴藹惟城惟蕃袞
衣善職彤弓受言飾館春宮稅鑣青輅長筵逶迤浮觴汾沂 宋謝靈運
三月三日侍宴西池詩曰詳觀記牒鴻荒莫傳降及雲鳥曰聖則天虞承
唐命周襲商艱江之永矣皇心惟眷矧乃暮春時物芳衍濫觴逶迤周
流蘭殿禮備朝容樂闋夕宴 宋謝惠連三月三日曲水集詩曰四時著
平分三春稟融燠遲遲和景婉天天園桃灼攜朋斯郊野昧旦辭堦郭斐
雲與翠嶺芳飈起華薄解轡優崇丘藉草繞迴壑際渚羅時款託波汎輕

爵 齊謝朓爲皇太子侍華光殿曲水宴詩曰傍求遂古迹聽鴻名大寶
曰位得一爲貞朱紱叶祉綠宇摘英升配同貫進讓殊聲大橫將屬會昌
已命國步中阻震居膺慶璽劔克傳龜玉增映玄塞北靡丹微南極浮毳
駕風非冰非陟西京藹藹東都濟濟秋祓濯流春楔浮醴初吉云獻上除
方啓昔駕陽穎今歡雲陞嘉樂舊矣芳宴在斯載留神矚有睟天儀龍精
已映威仰未移葉依黃鳥花落春池高宴弘敞禁林稠密青陞崖起丹樓
間出翠葆隨風金戈動日惆悵清管徘徊輕伶瀟灑入筵河淇流昨媧若
來往觴肴汾沂歡既終清光欲暮輕輶迴首華組徐步 又爲人作三
日侍華光殿曲水宴詩曰神理內寂機象外融遺情汾水垂冕鴻宮樹以
司牧匪我求蒙徒勤日用誰器玄功當寧日吳求衣未明抵壁焚翠銷劔
隳城九疇式序三辟載清麗景則春儀方在震重聖積厚金式瓊潤被穢
河浦張樂春疇旣停龍駕亦汎鳧舟初鸞命曉朝華開夜飾陞導源迴伊
流瀾間館巖敞長廊水架金鷗搖蕩玉姐推移筵浮水豹席擾雲螭歡茲
廣宴穆是天儀 梁簡文帝三日侍宴林光殿曲水詩曰芳年留帝賞應

物動天襟挾苑連金陣分衡度羽林帷宮對
影亭臯共生陰林花初墮落池荷欲吐心
廣掖層殿通高岑風旗爭曳

美色麗景復妍遙握蘭唯是旦採艾亦今朝
迴沙溜碧水岫散桃天綺

花非一種風絲亂百條雲起相思觀日照飛
虹橋繁華炫殊色燕趙艷妍

妖金鞍汗血馬寶髻珊瑚翹蘭聲起穀袖蓮
錦束瓊腰相看隱綠樹見人

還自嬌玉桂鳴羅薦渠枕泛迴潮洛濱非拾
羽滿握詎貽椒 又三日侍

皇太子曲水宴詩曰震德協靈年芳節淑濯
伊臨瀟蕩心愉目驥騎晨野

披金曉陸蕙氣卷旌神麗擊鼓曾岑偃塞登
觀若堯煙生翠幕日照綺寮

銀華晨散金芝暮搖綠水動葉丹距映條顧
惟非薄徒承恩裕藝學未優

聲績不樹豈辨河書寧摘淮賦徒偶羣龍終
慙並馭 又曲水聯句詩曰

春色明上巳桃花落繞溝波迴卮不進綸下
鉤時留韞終水時迴岸花觴

轉更周陳肴渡玉俎垂餌下銀鈎王卿迴川
入帳殿列俎間芳洲漢艾凌

波出楓拂岸游吏肩王生迴水碓祭姬蕩
輕舟岸燭斜臨水波光上映

樓瞰梁沈約三日侍鳳光殿曲水宴詩曰光
遲蕙敏氣婉椒臺皇心愛矣

帝曰遊哉王鸞徐鸞翠鳳輕迴別殿廣臨離宮洞啓川祇奉壽河宗相禮

清洛漸筵長伊流陞洄盪嘉羞搖漾芳醴輕歌易繞弱舞難持素雲留管

玄鶴停絲引思爲歲歲亦陽止叨服賁身身亦昌止徒勤丹漆終愧文梓

又上巳華光殿詩曰於維盛世即軒媽朝鄴宴鑄復在斯朝光灼爍映蘭

池春風婉轉入細枝時鸞顧暮聲合離輕波微動漾羽卮河宗海若生蛟

螭浮梁徑度跨迴漪朱顏始洽景將移安得壯士駐奔曦 又侍林光殿

曲水宴詩曰宴鑄鏘玉鑾遊汾舉仙輶榮光泛采旄脩風動芝蓋淑氣婉

登辰天行聳雲旆帳殿臨春標帷宮繞芳薈漸席周羽觴分墀引迴瀨穆

穆寶化昇濟濟皇陞泰將御遺風軫遠侍瑤臺會 又三日率爾成篇詩

曰麗日屬元巳年芳具在斯開花已匝樹流鸞復滿枝洛陽繁華子長安

輕薄兒東出千金堰西臨鴈鶩陂遊絲映空轉高楊拂地垂綠幘文照曜

紫鸞光陸離清辰戲伊水薄暮宿蘭池象筵鳴寶瑟金餅汎羽卮寧憶春

蠶起日暮桑欲萎 梁劉孝綽三日侍華光殿曲水宴詩曰薰被三陽暮

濯袂元巳初皇心騰樂飲帳殿臨春渠豫遊高夏諺凱樂盛周居復以禁

林日丰茸花樹舒羽觴環階轉清瀾傍席疏妍歌已嘹亮妙舞復紆餘九
成變絲竹百戲起龍魚 又三日侍安成王曲水宴詩曰匯澤良孔殷分
區屏中縣躡跨兼流采矜唯通封甸吾王奄鄴畢折圭承羽傳不資魯俗
移何待齊風變東山富遊士北土無遺彥一言白壁輕片善黃金賤餘辰
屬上巳清夜追前諺持此陽瀨遊復展城隅宴芳洲亘千里遠近風光扇
方歡厚德重誰言薄遊倦 梁劉孝威待宴樂遊林光殿曲水詩曰蒸哉
軒頊赫矣堯心女媧補石重華棄金湯羅禹扇羲瑟農琴皇平備矣受命
君臨試舟五反和樂九成鈞楯秘戲協律新聲丹盃水激絳采垓榮天吳
還往海若逢迎 又三日侍皇太子宴詩曰二龍巡夏代八駿馭周朝豫
遊光帝則樂飲盛民謠皇儲遵洛禊濫觴追灞橋掌板開神藥司馬動鑾
鑾周旗交彩眊晉鼓雜清簫旌宮臨廣隰藻衛樂巖椒蘭樽公曲折靈若
沂迴潮 梁庾肩吾三日侍蘭亭曲水宴詩曰榮星依夜動鑾駕忽朝遊
旌門臨苑樹相風生鳳樓春生露泥泥天覆雲油油桃花舒玉澗柳葉暗
金溝楔川分曲洛帳殿掩芳洲湧躍頰魚出參差絳棗浮百戲俱臨水千

鍾共逐流 北齊邢子才三日華林園公宴詩曰迴鑾自樂野弭蓋屬臨
池五承接光景七友樹風儀芳春時欲遽覽物惜將移新萍已冒沼餘花
尚滿枝草滋徑蕪沒林長山蔽虧方筵羅玉俎激水漾金卮歌聲斷且續
舞袖合還離 隋盧思道上巳楔飲詩曰山泉好風景城市獸置塵聊持
一罇酒共尋千里春餘光下幽桂夕吹舞青蘋何言出關後重有入林人
後漢杜篤後楔賦曰王侯公主暨平富商用事伊維帷幔玄黃於是
旨酒嘉肴方丈盈前浮棗絳水酌酒釀川若乃窈窕淑女美勝豔姝戴翳
翠珥明珠曳離桂立水涯微風掩璫纖縠低徊蘭蘇眇蟹感動情魂若乃
隱逸未用鴻生俊儒冠高冕曳長裾坐沙渚談詩書詠伊呂歌唐虞 晉
成公綏洛楔賦曰考吉日簡良辰拔除解楔司會洛濱妖童媛女嬉游河
曲或振纖手或濯素足臨清流坐沙場列疊樽飛羽觴 晉張協洛楔賦
曰夫何三春之令月嘉天氣之氤氲和風穆以布暢百卉曄而敷芬川流
清冷以汪濊原隰葱翠以龍鱗游魚澆潏於淥波玄鳥鼓翼於高雲美節
慶之動物悅群生之樂欣故新服之既成將楔除於水濱於是縉紳先生

嘯傳命友攜朋接黨冠童八九主希孔墨賓慕顏柳臨涯詠吟濯足揮手
乃至都人士女弈弈祁祁車駕岬岵充溢中逵粉葩翕習綠阿被湄振袖
坐風接袵成幃若夫權戚之家豪侈之族采騎齊鑣華輪方轂青蓋雲浮
參差相屬集乎長洲之浦曜乎洛川之曲遂乃停輿蕙渚稅駕蘭田朱幔
虹舒翠幕蜺連羅樽列爵周以長筵於是布椒醕薦柔嘉祈休吉蠲百病
漱清源以滌穢兮攬綠藻之纖柯浮素卵以蔽水瀝玄醪於中河 晉褚
爽禊賦曰伊暮春之令月將解袂於通川凌元巳之清晨邈微風之冷然
川迴瀾以澄映嶺插嶸以霏烟輕霞舒於翠崖白雲映乎青天 晉夏侯
湛禊賦曰美暮春之嘉辰美靈氣之和柔結方輓之奏路敷令節而宣遊
爾乃鈴鳴擢翠旗垂繁纓微雲乘軒清風卷旌飛輪焱起良馬雷驚車駕
鱗萃男女霧會服煥羅縠翠翳連蓋榮香丸於素襟結九齡乎時外粲爛
虺韓混曄發越若乎朝春挺葩夕霞抱月爾乃臨清流背綠柯雪幕高接
丹組四羅 晉阮瞻上巳會賦曰臨清川而嘉讌聊假日以遊娛蔭朝雲
而爲蓋託茂樹以爲廬好脩林之翳鬱樂草莽之扶疎列四筵而設席祈

吉祥於斯塗酌羽觴而交酬獻遐壽之無疆同歡情而悅豫欣斯樂之愷
慷發中懷而弦歌託情志於宮商 梁蕭子範家園三日賦曰春亦暮止
田家上巳時將礫於九門節方郊於七里扇習習之和風照遲遲之華晷
飛玄翮之土鷺奪丹矚之山雉聊結新而濯故式東流之前軌居免上漏
樹非榛栗既無擇於爽塏曾不訪於凶吉右瞻則青溪千仞北觀則龍盤
秀出與歲月而荒茫同林藪之蕪密懽茲嘉月悅此時良庭散花藥傍插
筠篁灑玄醪於沼沚浮絳棗於泱泱觀翠輪之出沒戲青舸之低昂 周
庾信三月三日華林園馬射賦曰于時玄鳥司曆蒼龍馭行羔獻冰開桐
華萍合皇帝幸於華林之園千乘雷動萬騎雲屯落花與芝蓋同飛楊柳
與春旗一色乃命群臣陳大射之禮騶虞九節狸首七章於是選朱汗之
馬校黃金之埒紅陽飛鵠紫鸞陸沈唐成公之騶驢海西侯之千里莫不
飲羽銜竿吟援落鴈鍾鼓振地埃塵漲天綵則錦市俱移錢則銅山合徙
實天下之至樂景福之歡欣者也歲次昭陽月在大梁其日上巳其時少
陽春吏司職青祗効梓徵萬壽於平樂開千門於建章皇帝翊四校於仙

園迴六龍於天苑華蓋平飛鳳鳥細轉帷宮宿設帳殿開筵傍臨細柳斜
界宜年河濬雍草渭口澆泉壩雲五色的暈重圓陽管既調春絃實撫玉
律調鍾金鐸節鼓於是咀銜拉鐵逐日追風並試長秋之埒俱下蘭池之
宮鳴鞭則汗赭入埒則塵紅變三驅而畫鹿登百尺而懸熊禮正六耦詩
歌九節弓如明月對棚馬似浮雲向埒鴈失羣而行斷援求林而路絕乃
有六郡雄才五陵高選新迴馬邑之兵始罷龍城之戰尚帶流星猶乘奔
電始聽鼓而唱籌即移竿而操箭熊耳刻杯浮雲盡疊水衡之錢山積織
室之錦霞開司筵賞至酒正杯來既而日下澤宮筵闌相圍悵從蹕之留
歡眷迴鑾之餘武

晉王羲之三日蘭亭詩序曰永和九年歲在癸丑
暮春之初會于會稽山陰之蘭亭脩禊事也羣賢畢至少長咸集此地有
崇山峻嶺茂林脩竹又有清流激湍映帶左右引以爲流觴曲水列坐
其次雖無絲竹管絃之盛一觴一詠亦足以暢叙幽情是日也天朗氣清
惠風和暢仰觀宇宙之大俯察品類之盛所以遊目騁懷足以極視聽之
娛信足樂也

晉孫綽三日蘭亭詩序曰古人以水喻性有旨哉斯談非

以停之則清混之則濁耶情因所習而遷移物觸所遇而興感故振轡於
朝市則充屈之心生閑步於林野則遼落之志興仰瞻羲唐邈已遠矣近
詠臺尚顧深增懷爲復於曖昧之中思繁拂之道屢借山水以化其鬱結
永一日之足當百年之溢以暮春之始楔于南澗之濱高嶺下尋長湖萬
頃隆屈澄汪之勢可爲壯矣乃席芳草鏡清流覽卉木觀魚鳥具物同榮
資生成暢於是和以醇醪齊以達觀決然兀矣焉復覺鵬鷗之二物哉
宋顏延之三日曲水詩序曰夫方策既載皇王之跡已殊鐘石畢陳舞詠
之情不一雖淵流遂往詳略異聞然其宅天衷立民極莫不崇尚其道神
明其位拓世貽統固萬葉而爲量者也有宋函夏帝圖弘遠高祖以聖武
定鼎規同造物皇上以獻文承曆景屬宸居隆周之卜既永宗漢之兆在
焉正體毓德於少陽上宰宣哲於元輔晷緯昭應山瀆效靈五方雜遝四
輿來暨頽莖素蘂并柯共穗之瑞史不絕書棧山航海逾沙軼漠之貢府
無虛月日躔胃維月軌青陸皇祇發生之始后王布和之辰思對上靈之
心以惠庶萌之願加以二王于邁出錢戒吉有詔掌故爰命司曆獻陳洛

飲之禮具上巳之儀南除釐道北清禁林左闕巖陞右梁潮源略亭皇跨
芝壘死大液懷曾山松石峻峴葱翠陰烟游泳之所攢萃翔驟之所往還
閑水環階引池分席春官聯事蒼靈奉塗然後升祕駕胤緹騎撫玉鑾發
流吹以降于行所禮也龍文飾轡青翰侍御華裔殷至觀聽騫集楊袂風
山舉袖陰澤靚粧藻野袷服緡川故以隱賑外區煥衍都內者矣上膺萬
壽下提百福布筵稟和闔堂依德開爵園而廣宴並命在位展詩發志則
鄩宮之不懸方且排鳳闕以高遊夫誦美有章陳信無愧者歟齊王融三日曲水詩序曰臣聞出豫爲象
鈞天之樂張焉時乘既位御氣之體元則大悵望姑射之阿然宵眇
璿臺之上穆王八駿如舞璫水之陰亦有饗云固不與萬民共也我大齊
之握機創曆誕命建家接禮貳宮考庸太室昭華之珍既徙延喜之玉攸
歸革宋受天保生萬國度邑靜鹿丘之歎遷鼎息大垓之慙駭發開其遠
祥定爾固其洪業皇帝體膺上聖運鍾下武冠五行之秀氣邁三代之英

風昭章雲漢暉麗日月猶且具明廢寢吳晷忘殮懼負重於春水懷御介
於秋駕儲后睿哲在躬妙善居質內積和順外發英華斧藻至德琢磨令
範若夫族茂麟趾宗固磐石跨躋昌姬韜軼炎漢元宰北肩於尚父中鉉
繼踵平周南分陝流勿剪之歡來仕允克施之譽本枝之盛如此稽古之
政如彼故免羣生於湯火納百姓於休和引鏡皆明目臨池無洗耳沉冥
之怨既缺適軸之疾已消讒莠茂聞攘爭揜息稀鳴桴於砥路鞠茂草於
圓扉侮食來王左言入侍一尉侯於西東合車書於南北偃革辭軒銷金
罷刃天瑞降地符升澤馬來器車出江海呈象龜龍載文功既成矣世既
貞矣信可以優遊暇豫作樂崇德者歟于時青鳥司開條風發歲粵斯上
巳惟暮之春禊飲之日在茲風舞之情咸蕩載懷平圃乃睠芳林芳林園
者福地輿區之湊丹陵若水之舊殷殷均乎姚澤膺膺尚於周原飛觀神
行虛簷雲構離房乍設層樓間起負朝陽而抗殿跨靈沼而浮榮鏡文虹
於綺疏浸蘭泉於玉砌幽幽叢薄秩秩斯干新萍泛沚華桐發岫雜禾采
於柔荑亂嚶聲於錦羽禁軒承幸清官侯宴緹帷宿置帟幕宵懸旣而滅

宿登霞登光辨色徐鑾警節鳴鐘暢音七萃連鑣九旂齊軌爾乃迴輿駐
早岳鎮川渟睟容有穆賓儀式序授几肆筵因流波而成次蕙肴芳醴任
激水而推移葆佾陳階金匏在席戚奏翹舞奮動邪詩召鳴鳥于嶠山追
伶倫於嶰谷清歌有闋羽觴無筭上陳景福之賜下獻南山之壽信凱宴
於在藻知和樂於食苹 梁簡文帝三日曲水詩序曰竊以周城洛邑自
流水以禊除晉集華林同文軌而高宴莫不禮具義舉沓矩重規昭動神
明雍熙鍾石者也皇太子生知上德英明在躬智湛靈珠辯均河注騰茂
實於三善振嘉聲於八區是節也上巳屬辰餘萌達壤倉庚應律女夷司
候爾乃分階樹羽疏泉泛爵蘭觴汾沂蕙肴來往賓儀式序盛德有容吹
發孫枝聲流嶰谷舞艷七盤歌新六變遊雲駐綵仙鶴來儀都人野老雲
集霧會結軫方衢飛軒照日

五月五日

琴操曰介子綏割其腓股以啖重耳重耳復國子綏獨無所得綏甚怨恨
乃作龍蛇之歌以感之終不肯出文公令燔山求之子綏遂抱木而燒死

文公令民五月五日不得發火

國語云介子推續漢禮儀志曰五月五日朱索五色柳桃印爲門戶飾以止惡氣

風土記曰仲夏端五烹鶩角黍端始也

謂五月初五日也又以菰葉裹黏米煮熟謂之角黍 續齊諧記曰屈原

五月五日投汨羅而死楚人哀之每至此日竹筒貯米投水祭之漢建武

中長沙歐回曰日忽見一人自稱三閭大夫謂曰君當見祭甚善但常所

遺苦蛟龍所竊今若有惠可以楝樹葉塞其上以五采絲縛之此二物蛟

龍所憚也回依其言世人作粽并帶五色絲及楝葉皆汨羅之遺風也

崔寔四民月令曰五月五日取蟾蜍可合惡疽瘡取東行螻蛄治婦難產

會稽典錄曰女子曹娥者會稽上虞人父能絃歌爲巫漢安帝二年五月

五日於縣江沂濤迎波神溺死不得尸骸娥年十四乃緣江號哭晝夜不

絕聲七日遂投江而死 抱朴子蟾蜍萬歲者頭上有角額下有丹書八

字再重五月五日午時取之陰乾百日以其足畫地即爲流水 又曰或

問辟五兵之道答曰以五月五日作赤靈符着心前 風俗通曰五月五

日以五絲絲繫臂者辟兵及鬼令人不病溫亦因屈原 又曰五月五日

日以五絲絲繫臂者辟兵及鬼令人不病溫亦因屈原 又曰五月五日

日以五絲絲繫臂者辟兵及鬼令人不病溫亦因屈原 又曰五月五日

續命縷俗說以益人命 夏小正曰此日蓄採衆藥以蠲除毒氣 荆楚記曰荆楚人以五月五日並蹋百草採艾以爲人懸門戶上以禳毒氣又曰屈原以是日死於汨羅人傷其死所以並將舟楫以拯之今之競渡是其遺跡 大戴禮曰五月五日蓄蘭爲沐浴 楚辭曰浴蘭湯兮沐芳華 梁王筠五日望採拾詩曰長絲表良節金縷應嘉辰結廬同楚客採艾異詩人折花競鮮彩拭露染芳津含嬌起斜眄歛笑動微頰獻璫依洛浦懷珮似江濱

七月七日

列仙傳曰陶安公者六安鑄冶師行火者朱雀止治上曰安公治與天通七月七日迎汝以赤龍事具仙部又曰王子喬見桓長曰告我家七月七日待我於緱氏山頭至時乘白鶴在山頭望之不得到舉手謝時人數日而去漢書曰武帝七月七日生於漪蘭殿 漢武故事曰七月七日上於承華殿齋正中忽有一青鳥從西方來集殿前上問東方朔朔曰此西王母欲來也有頃王母至事具鳥部崔寔四民月令七月七日曝經書設酒脯時果散

香粉於筵上祈請於河鼓織女言此二星神當會守夜者咸懷私願或云見天漢中有奕奕正白氣如地河之波耀輝有光曜五色以此爲徵應見者便拜乞願三年乃得 竹林七賢論曰阮咸字仲容籍兄子也諸阮前世皆儒學內足於財唯籍一生尚道棄事好酒而貧舊俗七月七日法當曬衣諸阮庭中爛然莫非綈錦咸時總角乃豎長竿標大布犢鼻於庭中曰未能免俗聊復爾耳 世說曰郝隆七月七日見鄰人皆曝曬衣物隆乃仰卧出腹云晒書 續齊諧記曰桂陽城武丁有仙道謂其弟曰七月七日織女當渡河諸仙悉還宮弟問曰織女何事渡河荅曰織女暫詣牽牛世人至今云織女嫁牽牛也 古詩曰迢迢牽牛星皎皎河漢女纖纖擢素手札札弄機杼終日不成章涕泣零如雨河漢清且淺相去詎幾許盈盈一水間脉脉不得語 晉潘尼七月七日侍皇太子宴玄圃園詩曰商風初授辰火微流朱明送夏少昊迎秋嘉禾茂園芳草被疇於時我后以豫以遊 晉李充七月七日詩曰朗月垂玄景洪漢截皓倉牽牛難牽牧織女守空襄河廣尚可越怨此漢無梁 晉蘇彦七月七日詠織女

詩曰織女思北止牽牛歎南陽時來嘉慶集整駕巾玉箱瓊珮垂藻蕤
裾結雲裳釋纜紫微庭解衿碧琳堂歡讌未及究晨暉照扶桑悵悵一宵
促遲遲別日長 宋孝武七夕詩曰白日傾晚照絃月外初光炫炫葉露
滿肅肅庭風揚瞻言媚天漢幽期濟河梁服箱從奔輶統綺闕成章解帶
遽迴軫誰云秋夜長愛聚雙情款念離兩心傷 宋南平王劉鑠七夕詠
牛女詩曰秋動清風扇火移炎氣歇廣簷含夜陰高軒通夕月安步巡芳
林傾望極雲闕組幕縈漢陳龍駕凌霄發沉情未申寫飛光已飄忽來對
眇難期今歡自茲沒 宋謝惠連七夕詠牛女詩曰落日隱簷楹升月照
簾櫳團團滿葉露淅淅振條風蹀足循廣除瞬目矚曾穹雲漢有靈匹彌
年闕相從遐川阻昵愛脩渚曠清容弄杆不成藻聳轡驚前蹤昔離秋已
兩今聚夕無雙傾河易迴幹款顏難久悵沃若靈駕旋寂寥雲幄空留情
顧華寢遙心逐奔龍 宋王僧達七夕月下詩曰遠山歛氛侵廣庭揚月
波氣往風集隙秋還露泫柯節氣既已屏中宵振綺羅來歡詎終夕收淚
泣分河 宋顏延之爲織女贈牽牛詩曰婺女儷經星姮娥棲飛月慙無

二媛靈託身侍天闕閭闔殊未暉咸池豈沐髮漢陰不夕張長河爲誰越
雖有促宴期方須涼風發 宋謝靈運七夕詠牛女詩曰火逝首秋節明
經弦月夕月弦光照戶秋首風入隙陵風步曾岑憑雲肆遙脉徙倚西北
庭竦踴東南觀紈綺無報章河漢有駁軌 宋謝莊七夕夜詠牛女應制
詩曰輟機起春暮停箱動秋衿琬居照漢右芝駕肅河陰容裔泛星道透
迤濟烟潯陸離迎宵佩倏燦望昏簪俱傾環氣怨共歇浹年心珠殿釭未
沫瑤庭露已深夕清豈淹拂絃輝無人臨 梁武帝七夕詩曰白露月下
圓秋風枝上鮮瑤臺含碧霧羅幕生紫煙妙會非綺節佳期乃京年玉壺
承夜急蘭膏依曉煎昔悲漢難越今傷河易旋怨咽雙念斷悽悽兩情懸
梁簡文帝七夕穿針詩曰憐從帳裏出相見夜窓開針歌疑月暗縷散恨
風來 梁柳惲七夕穿針詩曰代馬秋不歸緇縹無復緒迎寒理夜縫映
月抽纖縷清露下羅衣秋風吹玉柱流景對秋夕餘光欲難駐 梁劉遵
七夕穿針詩曰步月如有意情來不自禁向光抽一縷舉袖弄雙針 梁
劉孝威七夕穿針詩曰縷亂恐風來衫輕羞指現故穿雙眼針時縫合歡

扇 梁沈約織女贈牽牛詩曰紅粧與明鏡二物本相親用持施點畫不
照離居人往秋雖一照一照還復塵塵生不復拂蓬首對河津冬夜寒如
是寧遽道陽春初商忽云至暫得奉衣巾施衿誠已故每聚忽如新 梁
王筠代牽牛荅織女詩曰新知與生別由來儻相值如何寸心中一霄懷
兩事歡娛未繾綣倏忽成離異終日遙相望祇益生愁思猶憶今春悲尚
有故年淚忽遇長河轉獨喜涼颼至奔情翊鳳軫精阿警龍轡 梁范雲
雲望織女詩曰盈盈一水邊夜夜空自憐不辭精衛苦河流未可填寸情
百重結一心萬處懸願作雙青鳥共舒明鏡前 梁劉孝威詠織女詩曰
金鈿已照耀白日未蹉跎欲待黃昏至含嬌渡淺河 梁何遜七夕詩曰
仙車駐七驪鳳駕出天潢月映九微火風吹百和香來歡暫巧笑還淚已
啼粧別離不得語河漢漸湯湯 梁庾肩吾七夕詩曰玉匣卷懸衣高樓
開夜扉姮娥隨月落織女逐星移離前忿促夜別後對空機倩語雕陵鵲
填河未可飛 又奉使江州船中七夕詩曰九江逢七夕初弦值早秋天
河來映水織女欲攀舟漢使具爲客星槎共逐流莫言相送浦不及穿針

樓 北齊邢子才七夕詩曰盈盈河水側朝朝長歎息不悵漸衰苦波流
詎可測秋期忽云至停梭理容色束衿未解帶迴鑾已霑軾不見眼中人
誰堪機上織願逐青鳥去暫因希羽翼 隋江惣七夕詩曰漢曲天榆冷
河邊月桂秋婉孌期今夜飄飄渡淺流輪隨月宿轉路逐綵雲浮橫波翻
瀉淚束素反緘愁此時機杼息獨向紅粧羞 杜審言七夕詩曰白露含
明月青雲斷絳河天街七裏轉關道 二神過襦服鏘環珮香筵拂綺羅年
年今夜盡機杼別情多 隋王春七夕詩曰天河橫欲曉鳳駕儼應飛落
月移粧鏡浮雲動別衣懼逐今宵盡愁隨還路歸猶將宿昔淚更上去年
機 隋張文恭七夕詩曰鳳律驚秋氣龍梭靜夜機星橋百枝動雲路七
香飛映月回雕扇交霞曳綺衣含情向華幄流態入重闌懽餘夕漏盡愁
結曉驂歸誰念分河漢還憶兩心違 隋庾信七夕賦曰兎月先上羊
燈次安覩牛星之曜景視織女之闌干於是秦娥麗妾趙豔佳人窈窕名
驚逶迤姓秦嫌朝粧之半故怱晚拭之全新此時併捨房櫳共往庭中縷
條繁而貫矩針鼻細而穿矩 南齊謝朓七夕賦曰金梭司炬火曜方流

素鍾當御夷則鳴秋朱光既夕京雲始浮盈多靈之藹藹升夜月之悠悠
步廣庭而延膝屬天媛而淹留嗟斯靈之淑景招好仇於服箱厭白玉而
爲飾霏丹霞而爲裳廻龍駕之容裔亂鳳管之妻鏘軾帝車而捐玦凌天
津而上翔悵漢渚之夕漲欣河廣之既梁臨瑤席而宴語綿含睇而蛾揚
嗟蘭夜而難永汙會促而怨長撫鳴琴而脩浩浣安歌而自傷歌曰月殿
清芳桂醕酬雲幄靜兮香風浮龍鑣蹀兮玉鑾整瞻星河兮不可留

七月十五

荆楚歲時記曰七月十五日僧尼道俗悉營盆供諸寺院 孟蘭盆經云
有七葉功德並幡花歌鼓果食送之蓋由此 又曰目連比丘見其亡母
生餓鬼中即以鉢盛飯往餉其母食未入口化成火炭遂不得食目連大
叫馳還白佛佛言汝母罪重非汝一人力所奈何當須十方衆僧威神之
力至七月十五日當爲七代父母現在父母厄難中者具百味五果以著
盆中供養十方大德佛勅衆僧皆爲施上呪願七代父母行禪定意然後
受食是時目連母得脫一切餓鬼之苦目連白佛未來世佛弟子行孝順

者亦應奉盂蘭盆爲爾可否佛言大善故後代人因此廣爲華飾乃至刻
木割竹飴蠟剪綵模花果之形極工妙之巧 道經曰七月十五中元之
日地官校勾搜選人間分別善惡諸天聖衆普詣宮中簡定劫數人鬼傳
錄餓鬼囚徒一時皆集以其日作玄都大獻於玉京山採諸花果珍奇異
物幢幡寶蓋清膳飲食獻諸聖衆道士於其日夜講誦是經十方大聖齊
詠靈篇囚徒餓鬼俱飽滿免於衆苦得還人中 楊炯孟蘭盆賦曰渾
元告秋羲和奏曉太陰望兮圓魄皎閭闔開兮涼風媚四海澄兮百川晶
陰陽肅兮天地省掃離宮清重閣設皇邸張翠幕鸞飛鳳翔睽陽條燦雲
舒霞布翕赫冥霍陳法供飾孟蘭壯神功之妙物何造化之多端青蓮吐
而非夏頰果搖而不寒銅鐵鈇錫瑇琅玕映以甘泉之玉樹冠以承露
之金盤憲章三極儀形萬類上廖廓兮法天下安貞兮象地殫怪力窮神
異少君王子掣曳兮若束玉女瑤姬翩僊兮不至鳴鸛鷀與鸞鸞舞鸛雞
與翡翠毒龍怒兮赫然在象奔兮沉醉怖魍魎潛魑魅離婁明日不足見
其精微匠石洗心不足徵其奧秘夫其遠也天台嶸起繞之以赤霞夫其

近也削成孤峙覆之以蓮花晃兮瑤臺之帝室施兮金闕之仙家其高也上諸天於大梵其廣也遍諸法於恒沙上可以薦元府於七廟下可以納羣動於三軍

九月九日

風土記曰九月九日律中無射而數九俗尚此月折茱萸房以揮頭言辟除惡氣而禦初寒續晉陽秋曰陶潛嘗九月九日無酒宅邊菊叢中摘菊盈把坐其側久望見白衣至乃王弘送酒也即便就酌醉而後歸續齊諧記曰汝南桓景隨費長房遊學累年長房謂之曰九月九日汝家當有灾厄急宜去令家人各作絳囊盛茱萸以繫臂登高飲菊酒此禍可消景如言舉家登山夕還家見雞狗牛羊一時暴死長房聞之曰代之矣今世人每至九日登山飲菊酒婦人帶茱萸囊是也孟嘉傳曰嘉爲相溫參軍既和而正溫甚重之九月九日溫遊龍山參僚畢集時佐吏並著戎服有風至吹嘉帽墮落溫謂左右及賓客勿言以觀其舉止臨海記曰郡北四十步有湖山山甚平正可容數百人坐民俗極重每九日菊酒之

展讌會於此山者常至三四百人宋謝瞻九日從宋公戲馬臺詩曰風至授寒服霜降休百工巢幕無留鷺遵渚有來鴻輕霞冠秋日迅商薄清穹聖心眷嘉節鳴鑾戾行宮四筵霑芳醴中堂起絲桐扶光迫西汜歡餘宴有窮來謝靈運九日從宋公戲馬臺送孔令詩曰季秋朔邊苦旅鴈違霜雪淒淒陽卉腓皎皎寒潭潔良辰感聖心雲旗興暮節鳴葭戾朱宮蘭卮獻時哲歸客逐海隅脫冠謝竟陵王蕭子良九日侍宴詩日月殿式詔司警言戾秋巒輕觴時薦落英可食齊王儉侍皇太子九日玄圃宴詩曰明明儲后冲默其量徘徊禮樂優遊風尚微言外融幾神內王就日齊暉儀雲等望本茂條榮源澄流潔漢稱間平周云魯衛咨我藩華方軌前軼秋日在房鴻鴈來翔寥寥清言淄苑尚想濠梁既暢旨酒亦飽微猷有來斯悅無遠不柔梁簡文帝九日侍皇太子樂遊苑詩曰麟光耀景神英春裕副極儀天金鏘玉度監撫昭明善物宣布惠潤崑瓊澤熙垂露秋晨精曜駕動官闈露點金節霜

沉玉璣玄戈側 翠羽翻暉庭迴鶴 蓋水照犀衣蘭羞薦俎竹酒澄芬千
青寫鳳百戲承雲紫鸞躍武赤兔越 空橫飛鳥箭半轉虵弓 又九日賦
韻詩曰是節協陽數高秋氣已精簷 芝逐月啓帷風依夜清遠燭承歌黛
斜橋聞履聲梁塵下未息共愛賞心 并 梁沈約爲臨川王九日侍太子
宴詩曰涼風北起高鴈南翻葉浮楚 水草折梁園淒清霜野惆悵晨鷗雲
輕寒樹日麗秋原三金廣設六羽高 陳寒英始獻京酎初醇靡靡神襟鏘
鏘羣彥思媚儲猷洽和奉宴恩暢蘭 席歡同桂殿景遽樂推臨風以眷麗
景天枝位非德舉任伍辰階祚均河 楚負岳未勝瞻雲難侶望古興傷心
焉載佇 又九日侍宴樂遊苑詩曰 憑玉宅海端宸御天上流飛壑靜震
騰川疑神貫極摘道漏泉西裘委柎 南風在弦暮芝始綠年桂初丹上林
葉下滄池水寒霜霑玉樹鴈動輕瀾 停蹕玉陛徙衛琤琕琤琕箱鳳綵羽蓋
鸞姿虹旌迢遞翠華歲蕤禮弘灞汭 義高洛湄 梁丘遲九日侍宴樂遊
苑詩曰朱明已謝葶收司禮爰理秋 板備揚旌榮奉璋戔戔金貂濟濟上
林弘敞離宮非一綵殿迴風丹樓映 日隨珠甲帳屯衛周悉睟容徐動大

儀澄謐雲物游颺光景高麗枯葉未落寒花委 砌絲桐激舞楚雅閑慧
差繁響殷勤流詣 梁任昉九日侍宴樂遊苑詩曰帝德峻韶夏王功書
頌平共貫公五勝獨道邁三英我皇撫歸運時 乘信告成一唱革鍾石再
撫被絲笙黃草歸維木梯山薦玉榮時來濁河 變瑞起溫洛清物色動宸
眷民豫降皇情 梁劉苞九日侍宴樂遊苑正 陽堂詩曰六郡良家子幽
并遊俠兒立乘爭飲羽倒騎競紛馳鳴珂飾華 甿金鞍映玉羈膳羞殫海
陸和齊眠秋宜雲飛雅琴奏風起洞簫吹世終 高宴罷景落樹陰移微薄
承嘉惠飲德良不貴取効績無紀感恩心自知 梁王脩已九日詩曰霜
威始落翠寒氣初入堂隨珠爛似燭懸黎疑夜 尤舞步因絃折歌聲隨袂
揚夜深聞漏緩簷虛覺唱長 梁劉孝威九日 酌菊花酒詩曰露花疑始
摘羅衣似適熏餘杯度不取欲持嬌使君 梁 何遜爲西豐侯九日侍宴
樂遊苑詩曰皇德無與讓重規華帝勛垂去化 比屋卷領慎爲君翺飛悅
有道卉木荷平分宸襟動時豫歲序屬涼氛城 霞旦晃朗槐霧曉氤氳
和馳八襲鳳駕啓三羣羽觴歌湛露佾舞奏承 雲禁林終宴晚華池物色

曠疎樹翻高葉寒流聚細文 梁庾肩吾侍讌九日詩曰轍跡光周頃巡
遊減夏功鉤陳萬騎轉閭闔九門通秋暉逐行漏朔氣繞相風獻壽重陽
節迴鸞上苑中疏山開盤道閒樹出離宮玉醴吹花菊銀床落井桐飲羽
山西射浮雲翼北驄塵飛金埒滿葉破柳條空 周王褒九日從駕詩曰
黃山獵地廣青門官路長律改三秋節氣應九鍾霜曙影初分地暗色始
成光交布長秋坂緹幕杏間堂射馬垂雙帶豐貂佩兩璜苑寒梨樹紫山
秋菊葉黃終慙屢車對空假侍中郎 賦 宋傅亮九月九日登陵囂館賦
曰歲九旻之暮月肅晨駕而北逝度迴壑以停轅凌孤館而遠慙何物慘
而節哀又雲悠而風厲悴綠繁於寒渚墮豐灌於荒澁玩中原之芬菊惜
蘭圃之彫蕙旌竹柏之勁心謝梧楸之零脆爾乃流眄平隰落日還臯于
感具盈在物周騷聆離鷗之悽響沂鳴林之瀏飈彼遊子之苦傷每寤歎
於我勞矧集悲而鍾苦疚寸心其如忉眇天末以遙瞻怨故鄉之阻遼
書 魏文帝與鍾繇書曰歲往月來忽復九月九日九爲陽數而日月並
應俗嘉其名以爲宜於長久故以享宴高會是月律中無射言群木庶草

無有射而生至於芳菊紛然獨榮非夫含乾坤之純和體芬芳之淑氣孰
能如此故屈平悲冉冉之將老思食秋菊之落英輔體延年莫斯之貴謹
奉一束以助彭祖之術

藝文類聚卷第四